

Stolz drauf

I bin ned stolz drauf, wo i her bin.
I kann ned stolz sei auf a Land.
De oide Muatta Erdn,
de ghört koam von uns und wo ma her san,
liegt ned in unsrer Hand.

I bin dankbar meine Eltern,
sie haben mir mei Leben gschenkt.
Und wenn da Stolz is,
dann is des Stolz auf meine Kinder,
und Demut vor dem, der alles lenkt.

Stolz sei auf des, was in meim Paß steht,
des kummt ma reichlich albern vor.
Und weil der Stolz
bei so manchem Hand in Hand mit Haß geht,
hob i damit nix zum doa.

I bin ned stolz drauf, wo i her bin,
so wenig wia i mi aa dafür scham.
Mit vui z'vui Stolz im Kopf
san scho vui z'vui Kriag geführt wordn,
und vui z'vui Leit daschlogn.

I bin ned stolz drauf, wo i her bin,
weil i dafür überhaupt nix ko.
Und ob i jetzt Oberbayer,
Massai oder Eskimo bin,
d'Hauptsach is, i bin a freier Mo.